

Sas règulas de sa Política Agrìcula Comune (PAC) pro su 2021-2022

Su Regulamentu (UE) 2020/2220 (connotu comente *Regolamento Transitorio*), publicadu in su mese de nadale de su 2020 at istabilidu su funtzionamentu de sa PAC pro su 2021 e su 2022.

Custu Regulamentu at a permitere a sos Istados de s'UE de pòdere impreare sos contributos postos a disponimentu dae su *Quadro Finanziario Pluriennale (QFP) 2021-2027*, mantenende sas règulas atuales.

In realidade su *Regolamento Transitorio* cunsentit a sos Istados de s'Unione de cambiare disinnu subra argunas detziones natzionales: de sighire a punnare a sos balores mèdios de sos títulos, de torrare a pessare a comente minimare sos pagamenti chi sunt subra unu tzertu tantu, de tramudare risorsas dae su primu a su segundu pilastru, de mudare sos azudos acopiados, e àteras. Pro sas dimandas de su 2020 e 2021, custos disinnos de cambiamentu deviant èssere notificados a sa Cumissione europea, intro su 19 de frearzu de su 2021. S'Italia, pro more de sa crisi de governu chi b'at àpidu a cumintzu de annu, non est resessida a cumintzare unu cunfrontu cun sas reziones, sas partes econòmicas e sotziales pro disinnare ite mudare cunforma a sas règulas natzionales atuales. E duncas su Ministèriu de sa Políticas Agrìculas at dèvidu fàghere una tzirculare inue narat chi, pro sas dimandas de su 2020 e 2021, abarrant sas règulas natzionales de sa PAC.

Pro sas dimandas de su 2022 tocat de detzìdere e notificare a sa Cumissione UE intro prima die de austu de su 2021.

A pustis de custos duos annos prima die de ghennarzu de su 2023, at a intrare in vigore sa riforma de sa PAC chi est como in discussione.

Pro sos 7 annos imbenientes sas risorsas comunitàrias a disponimentu sunt belle 40 miliardi de euros pro totu s'UE. Pagu prus o mancu duas partes sunt pro sos pagamenti diretos. Si però cunsideramus, pro s'isvilupu rurale, non solu sas risorsas comunitàrias ma finas cussas de su cofinantziamentu natzionale, a sos pagamenti diretos e a s'isvilupu rurale a andant pagu prus o mancu su 50 pro chentu peròmine.

Sos Pranos de Isvilupu Rurale atuales sunt prorogados finas a su 31 de nadale de su 2022 e a sos contributos de su QFP s'azunghet cussu de su *Next Generation EU* chi pagu prus o mancu est de 8 miliardi de euros pro to tu s'UE, 910,6 miliones pro s'Italia (269, 4 pro su 2021, 641,2 pro su 2022). Pro sa Sardinna galu non s'ischit de seguru cale siant sos contributos chi divent arribare ca sas reziones galu non si sun postas de acordu subra sos critèrios pro partire sas risorsas a disponimentu. Semper e cando custu est unu passazu politicu obligadu sena su cale no s'at a pòdere colare a sa fase atuativa e duncas a s'aviu cuncretu de sas Misuras pro su 2021 e 2022.